

Evening Dogri (NSD) Bulletin 02-11-2024

आकाशवाणी

खास खास खबरां

1. कनाडा दे आरोपे पर अपना बरोध जतांदे होई भारत नै आखेआ ऐ जे गृह मंत्री अमित शाह हुंदे सरबंधै च कनाडा दिआं टिप्पणियां गलत ते बेबुनियाद न।
2. भारत ते ग्रीस नै सामरिक सांझ-भ्याली गी होर तगड़ा बनाने दी वचनबद्धता जाहर करदे होई बक्ख-बक्ख खेत्तरें च हासल तरक्की दी समीक्षा कीती।
3. रक्षा मंत्री राजनाथ सिंह होरें आखेआ ऐ जे जम्मू-कश्मीर च हाल च होए दे आतंकवादी हमले सुरक्षा च चूक दा नतीजा नेई हैन। उनें आखेआ जे सुरक्षाबलें आसेआ आतंकवादिएं गी बनकदा परता दित्ता जा करदा ऐ।
4. घाटी च होए दे द'ऊं बक्ख-बक्ख टाक्करें च 3 आतंकवादी मारे गे न ते 4 सुरक्षाकर्मी जख्मीं होए न।
5. भारत दी कृषा वर्मा नै अंडर19 विश्व मुक्केबाजी प्रतियोगिता च सुन्ने दा तगमा जित्तेआ ऐ।
6. ते क्रिकेट च मुंबई टेस्ट मैच दे अज्ज दुए रोज न्यूजीलैंड नै अपनी दुई पारी च भारत खलाफ 143 रन्जें दी बढ़त हासल करी लैती ऐ।

<><><><><><>

Canada

विदेश मंत्रालय नै केंद्री गृह मंत्री अमित शाह हुंदे मामले च बरोध जताने लेई कल संज्ञां कनाडा दे उच्च आयोग गी तलब कीता। कनाडा दे उपमंत्री डेविड मोरिसन होरें जन सुरक्षा ते राष्ट्री सुरक्षा पर स्थायी समिति दे अगगे केंद्री गृह मंत्री हुंदे सरबंधै च टिप्पणी कीती ऐ। विदेश मंत्रालय दे प्रवक्ता रणधीर जायसवाल होरें अज्ज नमीं दिल्ली च इक संवाददाता सम्मेलन दरान दस्सेआ जे 29 अक्तूबर गी ओटावा च स्थायी समिति दी कार्यवाही दे मामले च इक कूटनीतिक नोट बी उच्च आयोग गी सौंपेआ गेआ ऐ। उनें आखेआ जे कनाडा दे आला अधिकारियें अंतर्राष्ट्री मीडिया अगगे जानी-बूझियै जेहड़े खुलासे कीते न, ओह भारत दे ऐकड़े नजरिये दी तसदीक करदे न जे एह मजूदा कनाडा सरकार दा राजनीतिक एजेंडा ऐ। उनें चेतावनी दित्ती जे ऐसी गैर जिम्मेदाराना कार्रवाई दा दपक्खी सरबंधें पर गंभीर असर होग।

<><><><><><>

PM India Greece

प्रधानमंत्री नरेन्द्र मोदी ते ग्रीज दे प्रधानमंत्री किरियाकोस मित्सोताकिस होरें दौनें देसें बश्कार रणनीतिक सांझेदारी गी मजबूत करने दी अपनी प्रतिबद्धता गी फही पक्का कीता ऐ। टेलीफोन पर गल्लबात दरान दौनें नेताएं भारत-मध्य पूर्व यूरोप, आर्थिक गलियारे ते पच्छिम एशिया च विकास दे कन्नो कन्नी बक्ख-बक्ख क्षेत्रीय ते वैश्विक मुद्दें पर अपने बचार सांझे कीते। दौनें नेताएं हाल च गै उच्ची सतह दी गल्लबात राएं दपक्खिया सरबंधें च बेहतरी दी बी सराहना कीती ऐ। उनें बपार, रक्षा, शिपिंग ते राबते सनें दपक्खियां सैहयोग दे केई क्षेत्रें च तरक्की दी बी समीक्षा कीती।

<><><><><><>

India Thailand

भारत दी च'ऊं दिनें दी जात्तरा पर आए दे थाईलैंड दे विदेश मंत्री मैरिस सांगियाम्पोंगसा होरें अज्ज नमीं दिल्ली च विदेश मंत्री डाक्टर एस जयशंकर हुंदे कन्नै मलाटी कीती। सोशल मीडिया दी इक पोस्ट राहें डॉ. जयशंकर होरें आखेआ ऐ जे रॉयल कथिना समारोह लेई थाईलैंड दे विदेश मंत्री हुंदी जात्तरा दौनें मुख्यें बशकार लम्मे समें थमां चलदे आवा करदे ऐतिहासिक ते सांस्कृतिक सरबंधें दी मिसाल ऐ। उनें भारत—थाईलैंड सरबंधें, बहुपक्खी सैहयोग ते इलाकाई विकास पर चर्चा कीती। सांगियाम्पोंगसा होर वीरवारें नमीं दिल्ली पुज्जे हे। उनें कल नमीं दिल्ली च विवेकानंद इंटरनेशनल फाउंडेशन दे सदस्यें कन्नै विचार बटांदरा कीता ते ते धम्म दी एशियाई सदी सरबंधी विशे पर विशेष संबोधन दित्ता। उनें इस गल्लै पर जोर दित्ता जे रमानदारी ते स्थिरता गी बढ़ावा देने लेई भगवान बुद्ध हुंदिएं शिक्षाएं गी दुनिया भरै च फैलाने च थाईलैंड ते भारत दी महत्वपूर्ण भूमिका ऐ।

<><><><><><>

Rajnath Singh

जम्मू कश्मीर च हाल च होए दे आतंकवादी हमले गी मंदे भागें आला करार दिंदे होई केन्द्री रक्षा मंत्री राजनाथ सिंह होरें आखेआ जे सुरक्षा च कोई चूक नेई होई दी ते सुरक्षाबलें आतंकवादिएं गी बनकदा परता देआ'रदे न। उत्तर प्रदेश दे कानपुर च पत्रकार कन्नै गल्लबात करदे होई राजनाथ सिंह होरें आखेआ जे पैहले समें दे मकाबले हुन हमले घट्ट होई गे न। उनें एह बी आखेआ जे सुरक्षा च चूक दा मुद्दा नेई ऐ।

<><><><><><>

India China

विदेश मंत्रालय नै अज्ज आखेआ जे भारत ते चीन बश्कार डैमचौक ते डेपसांग च आपसी सैहमति कन्नै गश्त शुरू करी दित्ती ऐ। नमीं दिल्ली च पत्रकारें कन्नै गल्लबात करदे होई मंत्रालय दे प्रवक्ता रंधीर जयसवाल होरें जानकारी दित्ती जे आपसी रजामंदी कन्नै बन्ने परां वापस परतोने दा खीरी चरण 21 अक्तूबर गी होआ हा। प्रवक्ता होरें आखेआ जे कजानच दौनें मुल्खें दे लीढरें बश्कार होई दी गल्लबात मूजब दपक्खी सरबंधे गी स्थिर ते मजबूत बनाई रखने लेई विदेश मंत्री स्तरै दी गल्लबात जारी रौहग।

<><><><><><>

Vishwakarma Day

पूरे मुल्खै दे कन्नो कन्नी जम्मू च बी अज्ज विश्वकर्मा दिवस पूरे जोश ते उत्साह कन्नै मनाया जा'रदा ऐ। एह ध्यार हिंदू लोकें बड़ी आस्था कन्नै मनांदे न। इस ध्यार च करीगिर, मजदूर ते दस्तकारी करने आले कर्मी भगवान विश्वकर्मा हुंदी पूजा अर्चना करदे न ते तरक्की बाद्धे लेई उंदा आर्शीवाद लैंदे न। लोक भगवान विश्वकर्मा हुंदी अपनी दुकानें च , दफ्तर च, फैक्ट्रिएं ते कम्म करने आली थाहरें पर पूजा करदे न। ओह अपने औजारें, मशीनें दी पूजा करदे न ते किश अज्जै दे दिन उंदा इस्तेमाल करने थमां परहेज करदे न।

<><><><><><>

Orisa Accident

ओडिशा दे सुंदरगढ़ जिले च अज्ज बडलै मूंह न्हरे एमसीएल टपोरिया शिड़क उप्पर इक वैन ते ट्राला ट्रक बश्कार टक्कर होई जाने करी 5एं जनें दी मौत होई गई ते 7 होर घायल होई गे। पुलस बनें आखेआ जे 5एं जनें दी मौके उप्पर गै मौत होई गई, जदके घायलें गी अस्पताल च दाखल कराया गेआ ऐ। जानकारी

मूजब वैन च सुआर लोक इक सार्वजनिक कार्यक्रम थमां वापस परतोआ करदे हे जेल्लै एह हादसा होआ। हादसे धुंध कारण घट्ट लब्धने करी होआ।

<><><><><><><>

Encounter

कश्मीर घाटी च होए दे द'ऊं बक्ख-बक्ख टाक्करें च 3 आतंकवादी मारे गे न ते 4 सुरक्षाकर्मी जख्मीं होए न। हासल होई दिएं रिपोर्टें मुजब, दक्खनी कश्मीर दे अनंतनाग जिले दे हल्कान गली इलाके च जारी इक टाक्करे दरान सुरक्षाबलें द'ऊं आतंकवादिएं गी मारी-मुकाया ऐ। एह जानकारी फौज दी चिनार कोर नै सोशल मीडिया दी इक पोस्ट राहें सांझी कीती ऐ। मारे गेदे आतंकवादिएं दी पन्छान अजें कीती जा करदी ऐ। खीरी जानकारी थोने तगर इलाके च सुरक्षाबलें दा अभियान जारी हा। तोआई खबर एजेंसी पीटीआई मूजब, इक होर टाक्करे च सुरक्षाबलें श्रीनगर दे खान्यार इलाके च इक टाक्करे दरान इक आतंकवादी गी मारी-मुकाया ऐ। हासल रिपोर्टें मुजब, इलाके च आतंकवादिएं दी मजूदगी बारै पक्की सूह थोने परैन्त सुरक्षाबलें अज्ज बड्डलै खान्यार च घेराबंदी ते तपाशी अभियान चलाया हा जिस दरान इलाके च छप्पे दे आतंकवादिएं सुरक्षाबलें पर गोलीबारी कीती ते टाक्करा भखी पेआ। टाक्करे दरान सीआरपीएफ दे द'ऊं जवान ते जम्मू-कश्मीर पुलसा दे बी द'ऊं जवान जख्मीं होए न। सुरक्षाबलें दा अभियान अजें जारी ऐ। फौज दी चिनार कोर मूजब, घाटी च बांडीपोरा दे पनार इलाके च सुरक्षाबलें कन्नै होए दे इक लौहके नेय टाक्करे परैन्त किश आतंकवादिएं उत्थुआं नस्सियै जंगलें च जाई छप्पे दे न जिंदे सफाये लेई सुरक्षाबलें दा अभियान बरोबर जारी ऐ।

<><><><><><><>

Dy CM Jhiri Mela

उपमुख्यमंत्री सुरिंदर कुमार चौधरी होरें अज्ज जम्मू च इक बैठक लाइयै झिड़ी दे मेले लेई तैयारिएं दा जायजा लैता। औंदी 14 शा 24 नवम्बर तगर आयोजित

होने आहले झिड़ी दे मेले च तकरीबन 20 लक्ख लोक आँदे न ते एह् आयोजन, बक्ख—बक्ख सरकारी मैहकमें गी इक बधिया मौका उपलब्ध करोआंदा ऐ जेह्दे राहें ओह् जन कल्याण आहलिऐं अपनी योजनाएं दा सक्रियता कन्नै प्रचार करी सकदे न। उपमुख्यमंत्री होरें गलाया जे झिड़ी दा मेला नां छड़ा मुकामी राई—बाई लेई महत्वपूर्ण ऐ सगुआं एह् जम्मू दे सांस्कृतिक विरसे दे प्रदर्शन लेई बी अहम ऐ। उनें सरबंघत अधिकारिएं गी निर्देश जारी कीते जे ओह् विशेष पंडाल स्थापित करियै लोकें गी उंदे कल्याण लेई चलाई गोदी सरकारी योजनाएं बारै लोड़चदी जानकारीयां उपलब्ध करोआन। जम्मू दे डीडीसी भारत भूषण होरें बी इस बैठक च हिस्सा लैता। इस मौके उनें आखेआ जे मेला शुरु होने शा पैहले सब्बै मुख्ख ते राबता शिड़कें पर लुक्क पाई दित्ती जानी लोड़चदी ऐ। जम्मू मुंसिपल कारपोरेशन दे कमिशनर देवांश यादव, एसपी रूरल ब्रिजेश शर्मा ते होर दुए आला अधिकारिएं बी इस बैठक च शिरकत कीती।

<><><><><><>

Farooq Panchayat

नैशनल कांफ्रेंस दे प्रधान डॉ. फारूक अब्दुल्ला होरें अज्ज आखेआ ऐ जे केन्द्र शासत प्रदेश च तौले गै पंचैतें दे चुनां करोआए जांगन। उनें आखेआ ऐ जे इत्त सरबंघें च तैआरियां चलै करदियां न ते पंचैतें दे चुनां तौले गै करोआए जांगन। डॉ. अब्दुल्ला होरें जम्मू कश्मीर लेई राज्य दे दर्जे दे अधिकार दी गल्लै गी फही दोहराया ते आखेआ जे उंदी पार्टी केन्द्र शासत प्रदेश दे दर्जे गी स्वीकार नेई करदी ऐ। उनें आखेआ जे जम्मू कश्मीर दा राज्य दा दर्जा ब्हाल करने दा वायदा संसद च ते कन्नै सर्वोच्च अदालतै अगगे बी कीता गेदा ऐ। उनें आखेआ जे एह् दर्जा बिजन चिर लाए दे ब्हाल कीता जाना लोड़चदा ऐ।

<><><><><><>

World Boxing

भारत दी कृषा वर्मा नै कल अमरीका दे कोलाराडो च अंडर-19 विश्व मुक्केबाजी चैंपियनशिप च सुन्ने दा तगमा जित्तेआ ऐ। हालांके सुन्ने दा तगमा जित्तेपे उर दक द्रौड़ च शामिल 5 होर भारतीय मुक्केबाजें गी अपने अपने फाइनल च हार दा सामना करना पेआ। कृषा नै जर्मनी दी लेरिका साइमन गी 5-0 कन्नै हराइयै सुन्ने दा तगमा अपने नां कीता। तोआई चंचल चौधरी महिललाएं दी 48 किलोग्राम वर्ग दे फाइनल च इंग्लैंड दी रूबी बाईट शा हारी गेइयां। इस वर्ग च भारतीय मुक्केबाज गी आयोजन घोषित करी दित्ता गेआ जेह्दे कारण उनेंगी चांदी दे तगमे कन्नै गै संदोख करना पेआ।

<><><><><><>

Cricket Ind NZ

मुंबई दे वानखेड़े स्टेडियम च भारत ते न्यूजीलैंड बश्कार खेड्डे जा करदे मजूदा श्रृंखला दे त्रीये ते अखीरले टेस्ट मैचा दे अज्ज दुए रोज दिनै दा खेड्ड मुक्कने तगर न्यूजीलैंड दी टीम नै अपनी दुई पारी च 9एं विकेटें दे नुक्सान पर 171 रन्ज बनाई लैते। न्यूजीलैंड नै हून इस मैच च भारत खलाफ कुल 143 रन्जें दी बढत हासल करी लैती ऐ। भारत दी तरफा रविन्द्र जडेजा नै 4 विकेटां ते रविचन्द्रन अश्विन नै 3 विकेटां हासल कीतीआं। इंदे अलावा वाशिंगटन सुंदर ते आकाशदीप नै 1-1 विकेट हासल कीती। एह्दे शा पैहले अज्ज भारत दी पैहली पारी 263 रन्जें पर सिमटी गेई। भारत दी तरफा शुभमन गिल नै 90 रन्ज ते विकेटकीपर बल्लेबाज ऋषभ पंत नै 60 रन्ज बनाए। इनें दौनें दलियै 114 गेदें च 96 रन्ज जोड़े। वाशिंगटन सुंदर नै 36एं गेदें च 38 रन्जें दा जोगदान दित्ता। न्यूजीलैंड लेई ऐजाज पटेल नै 5 विकेटां हासल कीतीआं।

<><><><><><>